



Broj: 01-50-1-15-34/04.
Sarajevo, 4. maja 2004. godine

ZAPISNIK

35. sjednice Predstavničkog doma Parlamentarne skupštine Bosne i Hercegovine,
održane 4. maja 2004. godine

Sjednica je počela u 10,10 sati. Prisustvovalo je 40 poslanika. Odsustvo su opravdali Ibrahim Dedović i Nijaz Duraković.

Osim poslanika, sjednici su prisustvovali:

- iz Vijeća ministara: Bariša Čolak, Mirsad Kebo, Safet Halilović, Dragan Doko - ministri, te Dragan Mektić, Haris Bašić i Momir Tošić - zamjenici ministara;
- Iz međunarodnih organizacija: Maja Ribar - OHR, Aleksandar Vuković – OSCE, Dasha Kurzmann - Biefel, Sarah Keating – Chetugnal, Amra Muharemović i Emir Adžović – Evropska komisija, Jelena Despot i Ivana Jusufbegović – EUPM, Endre Gabor, Dirk Reinermann i Zorica Lešić – World Bank.

Predsjedavajući Doma Martin Raguž u uvodnim napomenama rekao je da na Proširenom kolegiju nije bilo prijedloga za dopunu dnevnog reda. Naglasio je da se radi o veoma zahtjevnom dnevnom redu 35. sjednice i u ime Kolegija i Proširenog kolegija zamolio da ni poslanici ne traže njegovo proširenje.

O prijedlogu dnevnog reda nije bilo rasprave.

Predsjedavajući je konstatirao da 35. sjednica ima sljedeći

DNEVNI RED

1. Zapisnik 33. sjednice Predstavničkog doma,
2. Poslanička pitanja i odgovori,
3. Prijedlog okvirnog zakona o visokom obrazovanju u Bosni i Hercegovini (prvo čitanje),
4. Zahtjev Vijeća ministara za razmatranje Prijedloga zakona o dopunama Zakona o carinskoj tarifi BiH po hitnom postupku, u skladu s članom 105. Poslovnika,
5. Zahtjev poslanika Momčila Novakovića za razmatranje Prijedloga zakona o izmjeni i dopuni Zakona o osnovama javnog televizijskog sistema i o Javnom radiotelevizijskom servisu BiH po hitnom postupku, u skladu s članom 104. Poslovnika,
6. Zahtjev poslanika Tihomira Gligorića za razmatranje Prijedloga zakona o izmjenama i dopunama Zakona o državnoj službi u institucijama BiH po hitnom postupku, u skladu s članom 104. Poslovnika,
7. Prijedlog zakona o Državnoj agenciji za istrage i zaštitu (drugo čitanje),
8. Prijedlog zakona o sprečavanju pranja novca (drugo čitanje),
9. Prijedlog okvirnog zakona o zalozima (prvo čitanje),
10. Prijedlog zakona o osnivanju Kompanije za prijenos električne energije (prvo čitanje),
11. Prijedlog zakona o osnivanju nezavisnog operatera sistema za prijenosni sistem u Bosni i Hercegovini (prvo čitanje),
12. Razmatranje prijedloga poslanika za glasanje o nepovjerenju Vijeću ministara Bosne i Hercegovine,

13. Imenovanje članova Komisije za koncesije Bosne i Hercegovine,
14. Prijedlog rezolucije o priznavanju statusa i prava nacionalnih manjina državljana bivše SFRJ u Republici Sloveniji (predlagač poslanik Sead Avdić),
15. Prijedlog rezolucije o privremenom moratoriju na član 121. Poslovnika Doma (predlagač poslanik Nenad Mišić),
16. Izvještaj Zajedničke komisije o nastojanju za postizanje sporazuma o identičnom tekstu zakona o važnosti javnih isprava,
17. Izvještaj Zajedničke komisije o nastojanju za postizanje sporazuma o identičnom tekstu Zakona o izmjenama i dopunama Zakona o zastavi BiH,
18. Izvještaj Komisije za ljudska prava, imigraciju, izbjeglice i azil o stanju ljudskih prava u predmetu Tržica Arizona,
19. Razrješenje i imenovanje članstva komisija Predstavničkog doma,
20. Davanje saglasnosti za ratifikaciju:
 - a) Prvog amandmana Sporazuma kreditnom sporazumu između Bosne i Hercegovine i Evropske banke za obnovu i razvoj,
 - b) Sporazuma između Bosne i Hercegovine i Švajcarske Konfederacije o unapređenju i recipročnoj zaštiti investicija,
 - c) Sporazuma o naučnotehničkoj saradnji između Vijeća ministara Bosne i Hercegovine i Vijeća ministara Srbije i Crne Gore,
 - d) Sporazuma između Vijeća ministara Bosne i Hercegovine i Vijeća ministara Srbije i Crne Gore o povratku izbjeglih osoba iz Bosne i Hercegovine i Srbije i Crne Gore.

Ad – 1: Zapisnik 33. sjednice Predstavničkog doma

O Zapisniku nije bilo rasprave.

Dom je jednoglasno usvojio Zapisnik 33. sjednice.

Ad – 2: Poslanička pitanja i odgovori

Odgovor na poslaničko pitanje komentirao je Ivo Miro Jović.

Postavljena su nova poslanička pitanja kako slijedi:

Momčilo Novaković:

Ponovo postavio ranije postavljena pitanja na koja nije dobio odgovore:

1.»Kada će biti izvršena pravična nadoknada Srbima, stanovnicima sela u općini Glamoč, na čijim imanjima je bio poligon barbara, ili pak poligon kasarne Vojske Federacije? (Rekao je da je pitanje postavio i u prethodnom sazivu u Domu naroda, ali nije dobio odgovor). Da li je u vježbama SFOR-a na tom području korištena municija sa osiromašenim uranom?» (11. sjednica – 9. aprila 2003.)

2. «Kada će građani srpske nacionalnosti, vlasnici objekata u Dobrinji I. i IV., dobiti urbanističke saglasnosti za objekte za koje su dobili rješenja za zauzimanje javne površine? Po čijem rješenju, odnosno odluci je dislocirano 16 objekata suprotno dogovoru svih relevantnih predstavnika vlasti?» - (20. sjednica, 30.10.2003.)

3. «Da li građani Petrova žive u Općini Petrovo ili u Općini Gračanica ili i u Petrovu i u Gračanici, ili pak u Općini Petrovo/Gračanica. Naime, radi se o Općini Petrovo koja se nalazi u Republici Srpskoj, a gdje se akta od Izborne komisije naslovljavaju na ime Gračanica/Petrovo (33. sjednica 14. 4. 2004.) ?»

Vinko Zorić:

«Ko određuje neradne dane u institucijama Bosne i Hercegovine i ko o tome obavještava zaposlene, a posebno poslanike u Parlamentarnoj skupštini BiH ?»

Petar Kunić:

«Kada će Vijeće ministara početi primjenjivati Uredbu o kontroli kvaliteta tečnih goriva i kada će regulirati uvoz surogata nafte (špirit, bazno ulje, petrolej, razni razređivači)?»

Adem Huskić:

«Prije otprilike godinu dana dobili smo pregled usvojenih zakona u Parlamentarnoj skupštini BiH po ministarstvima i Vijeću ministara. Tražim da nam se dostavi novi pregled usvojenih zakona u PSBiH od tog pregleda, po ministrstvima Vijeća ministara».

Azra Hadžiahmetović

«Hitno – punopravno članstvo BiH u IOM.

Trenutno je u BiH više projekata u procesu realizacije ove međunarodne organizacije, koji se odnose na prekvalifikaciju demobiliziranih vojnika, obuku DGS, povratak izbjeglica i povratak razmještenih osoba. «Trefiking» - trenutno najznačajnija preokupacija IOM - veoma je aktuelna u Evropi, a i BiH se nalazi na jednom od prvih mjesta za zaustavljanje transporta i trgovine ljudima. Dobici za bh. članstvo u IOM:

- Sarajevo – regionalni ured s vlastitim projektima i sa samostalnim usmjeravanjem i kontrolom sredstava koja se troše na njih;
- zapošljavanje domaće radne snage,
- delegiranje naših stručnjaka na radna mjesta gdje IOM zahtijeva projekte.

Milorad Živković

" S obzirom da se u nekim dijelovima BiH kasnilo s početkom i implemetacijom CIPS projekta, da još uvijek veliki broj naših građana nije izvadio dokumente, a rokovi za završetak projekta pristizu, pitanja: a) da li će doći do produženja rokova i b) da li će se ubrzo početi sa izdavanjem saobraćajnih dozvola u skladu sa CIPS-om?"

Mirsad Ćeman:

«Oba doma Parlamentarne skupštine BiH, kao uostalom i svi drugi predstavnici i drugi organi u BiH i svijetu (sada i ranije) redovno razmatraju i usvajaju – verificiraju zapisnike sa svojih zasjedanja. Sastavni dio zapisnika su transkripti sa sjednica, što sve skupa ima veoma važnu dokumentacionu, odnosno historijsku važnost.

Iz praktičnih razloga, stoga, iniciram i predlažem da se u formi «knjige», tj. uvezano u odgovarajućem formatu objave zapisnici sjednica oba doma Parlamentarne skupštine BiH (bez transkripta), i to za sve do sada završene mandate i ubuduće, tj. 1997.-1998., 1998.-2000., 2000.-2002., i tako redom .

Ad – 3:Prijedlog okvirnog zakona o visokom obrazovanju u Bosni i Hercegovini (prvo čitanje)

Uvodno izlaganje o Prijedlogu okvirnog zakona podnio je ministar civilnih poslova Safet Halilović.

Predsjedavajući Ustavno-pravne komisije Mirsad Ćeman, prije rasprave o Prijedlogu okvirnog zakona, govorio je u ime Ustavno-pravne komisije. Između ostalog, rekao je da je Komisija, kao nadležna, uložila značajan napor na razmatranju velikog broja amandmana i da su pokušali u atmosferi razumijevanja proniknuti u namjere i težnje i uvažiti sve ono što je dobro i usaglasiti se oko konačnog rješenja. Konstatirao je da ovaj put nisu u Komisiji uspjeli proceduru privesti kraju uz punu saglasnost, ali da, u ime Komisije, može reći da su se korektno odnosili prema svim prijedlozima i da su u Komisiji svi imali priliku iznijeti svoje mišljenje i podastrijeti argumente za svoja rješenja i prijedloge. Krajnji rezultat je to što je sadržano u Izvještaju Komisije, rekao je, između ostalog, Mirsad Ćeman.

U raspravi o Prijedlogu zakona prvi se javio Ivo Miro Jović. Između ostalog, kazao je da je Prijedlog okvirnog zakona o visokom obrazovanju retrogradan i protuevropski, iako je ministar Halilović pokušao reći da je moderan, savremen i evropski zakon. Osnovni princip u Evropi je jednakopravnost, drugi je princip poštivanje ustava, a ovaj zakon je protuustavan, kazao je, između ostalog, Ivo Miro Jović, te pojedinačno

elaborirao konkretne odredbe na koje je i u komisijskoj fazi imao amandmane. Rekao je da u izradi Prijedloga zakona nije učestvovao niko od predstavnika hrvatskog naroda.

O Prijedlogu okvirmog zakona vođena je duža i polemična rasprava, u kojoj su učestvovali: Seada Palavrić, Nikola Špirić, Sead Avdić, Vinko Zorić, Ivo Miro Jović, Tihomir Gligorić, Petar Kunić, Momčilo Novaković, Martin Raguž, Zlatko Lagumdžija, Mladen Potočnik, Jozo Križanović, Selim Bešliagić, Mirsad Ćeman, Beriz Belkić, Muhamed Moranjkić, Azra Hadžiahmetović i Šefik Džaferović. Tokom rasprave u dva navrata govorio je ministar Safet Halilović.

Predsjedavajući Martin Raguž konstatirao je da je iz rasprave proizašao prijedlog (predložili Zlatko Lagumdžija i Mirsad Ćeman) da se odredi dodatni rok od 7 dana da se , zajedno s Domom naroda , pokušaju usaglasiti dijelovi zakona kako bi se zakon usvojio u istovjetnom tekstu u oba doma, kao i da se određene stvari dodatno rasprave.

Predsjedavajući je ovaj prijedlog dao na glasanje. Međutim, u ime Kluba Stranke za BiH, Beriz Belkić je prije glasanja zatražio pauzu.

Poslije pauze, Beriz Belkić rekao je da se oni slažu da se Dom izjasni o prijedlogu, što je i poslovnički predviđeno. Međutim, ako Zakon dobije podršku u prvom čitanju, oni predlažu da se ide u drugo čitanje i da se glasa o amandmanima i o Prijedlogu zakona.

Predsjedavajući Raguž dao je na glasanje prijedlog za dodatno razmatranje Prijedloga zakona.

Za je glasalo 5, protiv 28, uzdržala su se 3 poslanika.

Predsjedavajući Raguž konstatirao je da prijedlog za dodatni rok za razmatranje Prijedloga zakona nije usvojen.

Zatim je predsjedavajući na glasanje dao prijedlog Zlatka Lagumdžije da se da dodatni rok od 7 dana za podnošenje novih amandmana na bazi vođene rasprave i da se Vijeće ministara izjasni do sjednice nadležne komisije.

Ni ovaj prijedlog nije usvojen. Za je glasalo 7, protiv 28, uzdržala su se 2 poslanika.

Predsjedavajući je dalje na glasanje dao Prijedlog okvirmog zakona u prvom čitanju.

Od 39 prisutnih, za je glasao 31, protiv 6, uzdržala su se 2 poslanika.

Predsjedavajući je konstatirao da je Prijedlog okvirmog zakona o visokom obrazovanju usvojen u prvom čitanju .

Nakon usvajanja Prijedloga zakona u prvom čitanju, predsjedavajući Martin Raguž rekao je da se nisu stekli uslovi da se ide u raspravu u drugom čitanju, budući da je u plenarnoj fazi podnesen 41 amandman.

Intervenirao je Beriz Belkić i zatražio da se na glasanje stavi njegov prijedlog koji je podnio u ime Kluba, da se ide u drugo čitanje.

Predsjedavajući Raguž naglasio je da , kao predsjedavajući Doma , smatra da nema uslova za drugo čitanje i da je i rasprava pokazala da su razlike velike, te da zakon ne bi trebalo donositi na silu.

Beriz Belkić insistirao je da se glasa o prijedlogu za drugo čitanje, rekavši da je zakon u prvom čitanju dobio veliku podršku, te da nema razloga da se Dom ne izjasni i o amandmanima.

Predsjedavajući Raguž odgovorio je da nije u redu, da je on svaki prijedlog ispoštovao, da nisu prošli prijedlozi za dodatno razmatranje i novi izvještaj , kao mogućnost izlaska iz situacije, te da nije korektno sad ići u drugu krajnost.

Drugi zamjenik predsjedavajućeg Nikola Špirić, između ostalog, rekao je da se, radi uvažavanja Kluba Stranke za BiH i drugih poslanika, Dom mora izjasniti o prijedlogu za drugo čitanje.

Vinko Zorić, u ime Kluba HDZ-Demokršćani, zatražio je da se poštuje dnevni red koji je usvojen, a na dnevnom redu je Prijedlog okvirmog zakona o visokom obrazovanju u prvom čitanju.

Šefik Džaferović naglasio je da kao član Kolegija želi javno reći da i prijedlog poslanika Beriza Belkića treba staviti na glasanje.

Nakon rasprave , Zlatko Lagumdžija zatražio je riječ. Između ostalog, rekao je da se za riječ javio da pokuša učiniti sve što je u njegovoj moći da ne odemo u dalji sunovarat bez potrebe. Naglasio je da ovdje imamo na jednom kapitalnom zakonu radikalno neslaganje između stranaka unutar vladajuće koalicije. Jedni su protiv zato što smatraju da su time neki nacionalni interesi ugroženi i to je respektabilan broj ljudi. U ovakvoj atmosferi tražiti drugo čitanje nije dobro, rekao je, između ostalog, Zlatko Lagumdžija i naglasio da daje punu podršku apelu predsjedavajućeg Martina Raguža.

Ponovo se za riječ javio Beriz Belkić i, između ostalog, rekao da je procjena Kluba Stranke za BiH bila da ovaj zakon može dobiti podršku i da su zato i predložili da se ide u drugo čitanje. Zamolio je da Dom glasanjem odgovori može li ili ne. To je dosad bila praksa, a ako predsjedavajući cijeni da po Poslovniku ne može, Klub neće insistirati, rekao je Beriz Belkić.

U daljoj raspravi povodom ovog pitanja učestvovali su: Martin Raguž, Beriz Belkić, Mladen Potočnik i Seada Palavrić. Poslije rasprave, predsjedavajući Raguž dao je pauzu radi konsultacija kako bi se izašlo iz nastale situacije.

Nakon pauze, predsjedavajući je izvijestio Dom da je u konsultacijama sa šefovima klubova i Kolegijem dogovoreno da sjednica nastavi rad na način da se Dom izjasni o prijedlogu Beriza Belkića da li će Dom ući u razmatranje Prijedloga zakona u drugom čitanju. Potom je prijedlog dao na glasanje.

Za prijedlog glasalo je 28, protiv 8, uzdržao se 1 poslanik. Iz Federacije za je glasalo 16, iz RS 12 poslanika.

Predsjedavajući je konstatirao da je prijedlog usvojen.

Poslije usvajanja ovog prijedloga diskutirao je Martin Raguž. Između ostalog, rekao je da je poslije Izvještaja nadležne komisije podnesen 41 amandman, da je 20 podnio Ivo Miro Jović, 20 on i jedan amandman Klub poslanika SNSD. Neki od njegovih amandmana identični su amandmanima Ive Mire Jovića. Ovdje sad imamo mogućnost da popravimo tekst zakona, rekao je predsjedavajući Raguž i objasnio koncepciju Kluba vezano za opredjeljenje da idu s ovakvim amandmanima. Prvo je elaborirao amandmane Ive Mire Jovića, te rekao da bi on mogao odustati od značajnog broja svojih amandmana ukoliko bi se usvojili amandmani Ive Mire Jovića.

Seada Palavrić zatražila je da se ministar Halilović izjasni o predloženim amandmanima, što bi olakšalo rad po Prijedlogu zakona.

Ministar Safet Halilović rekao je da u ovoj fazi može prihvatiti samo amandmane koje je usvojila Ustavno-pravna komisija i oni su sastavni dio zakonskog teksta.

U vezi s amandmanima dalje su diskutirali: Mladen Potočnik, Zlatko Lagumdžija, Mirsad Ćeman, Vinko Zorić, Fatima Leho, Ljiljana Milićević, Momčilo Novaković, Selim Bešliagić i Ivo Miro Jović.

Nakon rasprave, predsjedavajući je na glasanje dao prvo amandmane Ive Mire Jovića.

Amandmani 1. do 20. Ive Mire Jovića nisu usvojeni.

Također nije usvojen ni amandman Martina Raguža.

Dom je usvojio amandman Kluba poslanika SNSD na član 14. Prijedloga zakona.

Nakon glasanja o amandmanima, predsjedavajući Doma Martin Raguž zahvalio je poslanicima na konstruktivnoj raspravi i rekao da će ona vjerovatno poslužiti kao osnova za mnoge buduće rasprave. Zatim se izvinio i zatražio razumijevanje zato što će čin glasanja o Prijedlogu zakona u drugom čitanju prepustiti prvom zamjeniku Šefiku Džaferoviću. Nakon toga su svi poslanici Kluba HDZ-Demokršćani napustili salu.

Prvi zamjenik predsjedavajućeg Šefik Džaferović proveo je glasanje o Prijedlogu okvirnog zakona o visokom obrazovanju u BiH u drugom čitanju.

U vrijeme glasanja sjednici su prisustvovala 34 poslanika. Za Prijedlog zakona glasalo je 30, protiv 3, uzdržao se jedan poslanik. Po entitetima, iz Federacije BiH za je glasalo 17, iz RS 13.

Predsjedavajući sjednice konstatirao je da je usvojen Okvirni zakon o visokom obrazovanju u Bosni i Hercegovini, a onda je dao pauzu.

Nakon pauze, poslanici Kluba HDZ-Demokršćani vratili su se u salu i predsjedavajući Martin Raguž nastavio je predsjedavati sjednicom.

Ad – 4: Zahtjev Vijeća ministara za razmatranje Prijedloga zakona o dopunama Zakona o carinskoj tarifi BiH po hitnom postupku, u skladu s članom 105. Poslovnika

Obrazloženje zahtjeva i Prijedloga zakona podnio je ministar Dragan Doko.

U raspravi su učestvovali: Mladen Potočnik, Zlatko Lagumdžija, Momčilo Novaković, Muhamed Moranjić, Azra Hadžiahmetović, Nikola Špirić, Sead Avdić i Selim Bešliagić. Na primjedbe i pitanja iz rasprave odgovorio je ministar Doko.

Nakon rasprave, predsjedavajući je na glasanje dao zahtjev Vijeća ministara za hitni postupak.

Za zahtjev glasalo je 19, protiv 15, uzdržala su se 2 poslanika. Iz Federacije BiH za je glasalo 16, iz RS 3.

Predsjedavajući je konstatirao da zahtjev nije dobio entitetsku većinu iz RS, pa je u Kolegiju odmah proveo usaglašavanje.

Predsjedavajući je obavijestio poslanike o tome da u Kolegiju postoji saglasnost o zahtjevu za hitni postupak, pa je zahtjev dao na glasanje u drugom krugu, kada je iz RS protiv glasalo 7 poslanika, što je manje od dvije trećine.

Predsjedavajući je konstatirao da je zahtjev za hitni postupak u skladu s članom 105. usvojen, pa je odmah dao na glasanje Prijedlog zakona o dopunama Zakona o carinskoj tarifi.

Za Prijedlog zakona glasalo je 9, protiv 24, uzdržao se jedan poslanik. Prema tome, Predstavnički dom nije usvojio Prijedlog zakona o dopuni Zakona o carinskoj tarifi.

Ad – 5: Zahtjev poslanika Momčila Novakovića za razmatranje Prijedloga zakona o izmjeni i dopuni Zakona o osnovama javnog televizijskog sistema i o Javnom radiotelevizijskom servisu BiH po hitnom postupku, u skladu s članom 104. Poslovnika

U okviru ove tačke nije bilo rasprave.

S 31 glasom za, 4 protiv – iz Federacije za 18, iz RS 13, usvojen je zahtjev Momčila Novakovića da se Prijedlog zakona o izmjeni i dopuni Zakona o osnovama javnog televizijskog sistema i o Javnom radiotelevizijskom servisu BiH razmatra po članu 104. Poslovnika Doma.

Ad – 6: Zahtjev poslanika Tihomira Gligorića za razmatranje Prijedloga zakona o izmjenama i dopunama Zakona o državnoj službi u institucijama BiH po hitnom postupku, u skladu s članom 104. Poslovnika

Dom je, također bez rasprave, usvojio zahtjev Tihomira Gligorića da se po članu 104. Poslovnika razmatra Prijedlog zakona o izmjenama i dopunama Zakona o državnoj službi u institucijama Bosne i Hercegovine.

Ad – 7: Prijedlog zakona o Državnoj agenciji za istrage i zaštitu (drugo čitanje)

U raspravi povodom amandmana na Prijedlog zakona, koje su u plenarnoj fazi podnijeli Petar Kunić i Ljiljana Milićević, Šefik Džaferović, između ostalog, rekao je da se ovi amandmani ne tiču novih aspekata i da oni nisu bili poznati nadležnoj komisiji, te da se zbog toga on nije saglasio da se ovi amandmani puste u proceduru.

U okviru ove tačke diskutirali su: Vinko Zorić, Ljiljana Milićević i Seada Palavrić. Zatim je predsjedavajući na glasanje dao amandmane Petra Kunića i Ljiljane Milićević, koji su u suštini identični.

Za amandmane glasalo je 16, protiv 19, a 3 poslanika bila su uzdržana. Prema tome, amandmani nisu usvojeni.

Dom se dalje izjasnio o Prijedlogu zakona u drugom čitanju.

S 35 glasova za, jednim protiv i dva uzdržana Dom je usvojio Zakon o Državnoj agenciji za istrage i zaštitu.

Ad – 8: Prijedlog zakona o sprečavanju pranja novca (drugo čitanje)

Predsjedavajući je konstatirao da je nadležna komisija, po zaključku Doma, dostavila novi izvještaj, kojim je predložila da se Prijedlog zakona usvoji prema ranije podnesenom izvještaju.

O Prijedlogu zakona o sprečavanju pranja novca u drugom čitanju nije bilo rasprave, pa je predsjedavajući odmah proveo glasanje o Prijedlogu zakona.

Dom je Prijedlog zakona o sprečavanju pranja novca usvojio jednoglasno, s 38 glasova za.

Ad – 9: Prijedlog okvirnog zakona o zalozima (prvo čitanje)

Kako nije bilo rasprave, odmah je Prijedlog zakona dao na glasanje u prvom čitanju.

Dom je jednoglasno usvojio Prijedlog zakona u prvom čitanju.

Predsjedavajući je konstatirao da u plenarnoj fazi nije bilo amandmana na Prijedlog zakona, pa je predložio da se Dom izjasni da li će Prijedlog zakona razmatrati i u drugom čitanju. Ovaj prijedlog usvojen je s 37 glasova za i jednim uzdržanim.

Ni u drugom čitanju nije bilo rasprave.

Dom je jednoglasno (s 36 glasova) usvojio Okvirni zakon o zalozima.

Ad – 10: Prijedlog zakona o osnivanju Kompanije za prijenos električne energije (prvo čitanje)

Predsjedavajući Raguž podsjetio je na novi izvještaj nadležne komisije.

U ime Komisije za promet i komunikacije, Miloš Jovanović ukratko je obrazložio Izvještaj.

Poslije izlaganja predsjedavajućeg nadležne komisije, predsjedavajući Doma Prijedlog zakona dao je na glasanje u prvom čitanju.

S 35 glasova za i jednim protiv usvojen je u prvom čitanju Prijedlog zakona o osnivanju kompanije za prijenos električne energije.

Potom je Dom s 32 glasa za i 4 uzdržana usvojio prijedlog predsjedavajućeg da se o Prijedlogu ovog zakona raspravlja i u drugom čitanju.

Predsjedavajući je konstatirao da nema amandmana u plenarnoj fazi. Međutim, intervenirao je Momčilo Novaković, rekavši da je on podnio amandmane. Predsjedavajući je rekao da je bio dat zadatak nadležnoj komisiji da sastavi novi izvještaj, što je učinjeno, i da poslije novog izvještaja nije bilo amandmana.

Nakon razjašnjavanja o ovom pitanju, u kojem su učestvovali Momčilo Novaković, Šefik Džaferović i predsjedavajući Raguž, te predsjedavajući nadležne komisije Miloš Jovanović, pristupilo se glasanju o Prijedlogu zakona u drugom čitanju.

Za su glasala 33 poslanika, 3 su bila uzdržana.

Predsjedavajući je konstatirao da je Prijedlog zakona usvojen i u drugom čitanju.

Ad – 11: Prijedlog zakona o osnivanju nezavisnog operatera sistema za prijenosni sistem u Bosni i Hercegovini (prvo čitanje)

U uvodnim napomenama predsjedavajući Doma podsjetio je na novi izvještaj nadležne komisije, u kojem je predložila Domu da usvoji i zaključak u vezi s određivanjem sjedišta institucija Bosne i Hercegovine.

U raspravi u okviru ove tačke učestvovali su: Vinko Zorić, Momčilo Novaković i Miloš Jovanović.

Nakon rasprave, Dom se prvo izjasnio o Prijedlogu zakona u prvom čitanju, što podrazumijeva i zaključak predložen u Izvještaju nadležne komisije, a koji glasi:

Uzimajući u obzir prethodno izvršenu raspodjelu sjedišta novoformiranih državnih institucija, organa uprave i drugih nezavisnih organa BiH, zadužuje se Vijeće ministara BiH, kao i druge nadležne institucije, da prilikom predlaganja i utvrđivanja sjedišta ovakvih institucija imaju obavezu da sjedišta ravnomjerno dislociraju u sve dijelove Bosne i Hercegovine.

Za Prijedlog zakona u prvom čitanju, s ovim zaključkom, glasala su 24 poslanika, 3 su glasala protiv, jedan se uzdržao.

Zatim je predsjedavajući predložio da se Prijedlog zakona razmatra i u drugom čitanju. Prijedlog je usvojen s 27 glasova za, 2 protiv i 2 uzdržana.

U drugom čitanju nije bilo rasprave.

S 25 glasova za, 3 protiv i 3 uzdržana Dom je usvojio Zakon o osnivanju nezavisnog operatera sistema za prijenosni sistem u Bosni i Hercegovini.

Ad - 12: Razmatranje prijedloga poslanika za glasanje o nepovjerenju Vijeću ministara Bosne i Hercegovine

Prijedlog za glasanje o nepovjerenju Vijeću ministara obrazložio je Zlatko Lagumdžija.

Zatim je govorio predsjedavajući Vijeća ministara Adnan Terzić.

U raspravi i replikama u okviru ove tačke učestvovali su: Momčilo Novaković, Mladen Potočnik, Tihomir Gligorić, Adnan Terzić, Vinko Zorić, Seada Palavrić, Ljiljana Milićević, Miloš Jovanović, Nikola Špirić, Jozo Križanović, Mubera Ušanović, Martin Raguž, Zlatko Lagumdžija, Šefik Džaferović, Ivo Miro Jović i Muhamed Moranjkić.

Nakon rasprave, predsjedavajući je dao na glasanje prijedlog grupe poslanika za glasanje o nepovjerenju Vijeću ministara.

Za prijedlog je glasalo 9, protiv 23, uzdržala su se 2 poslanika.

Predsjedavajući je konstatirao da prijedlog grupe poslanika nije dobio podršku Doma.

Ad – 13. Imenovanje članova Komisije za koncesije Bosne i Hercegovine

U diskusiji u okviru ove tačke učestvovali su: Beriz Belkić, Nikola Špirić, Tihomir Gligorić, Momčilo Novaković i Ivo Miro Jović.

Beriz Belkić kazao je da Klub Stranke za BiH neće podržati prijedlog kandidata, jer misle da nisu nivo potreba ovako značajne komisije. Obrazlažući stav Kluba, između ostalog, iznio je primjedbu da iz prijedloga nije vidljivo koliko je kandidata bilo, koje su strukture, koje kompetentnosti itd., te da predloženi kandidati, koji bi kaotrebali da su iz Republike Srpske ili Distrikta Brčko, žive u Federaciji.

Nikola Špirić, između ostalog, kazao je da je veoma bitno da na odgovorna mjesta dolaze ljudi koji su spremni odgovoriti zadatku, da bi ova zemlja uspjela, te da nije ubijeđen da imena koja su predložena mogu odgovoriti zadatku. Skrenuo je pažnju na biografije koje su o sebi kandidati napisali i apostrofirao biografiju jednog kandidata koji je naglasio da je «agresijom na BiH i brutalnim ratom njegov rad nasilno i neopravdano prekinut». Naglasio je da treba birati kandidate koji će udovoljiti onome što će biti njihov zadatak, a da ocjene o onome šta se dešavalo treba prepustiti onima koji su za to nadležni. Predložio je da se o kandidatima glasa pojedinačno kako ne bi sve stavili u istu ravan i naglasio da je jako loš primjer glasanje u paketu za 5 do 10 ljudi ako želimo doći do dobrih kadrova.

Tihomir Gligorić podržao je diskusije Beriza Belkića i Nikole Špirića i, između ostalog, rekao da se ovo važno pitanje davno moglo završiti da se pošteno radilo.

Momčilo Novaković podržao je prijedlog Nikole Špirića da se pojedinačno glasa o predloženim kandidatima ako je to moguće. Između ostalog, rekao je da ima rezervu prema određenim kandidatima i da su dva od sedam kandidata 1943. i 1940. godište, pa misli su bliže savjetu penzionera nego ovoj komisiji.

Ivo Miro Jović rekao je da podržava kandidate iz reda hrvatskog naroda.

Nakon rasprave predsjedavajući Doma kazao je da je prijedlog kandidata dostavljen od Vijeća ministara i da se tretira kao prijedlog u cjelini, te da je i glasanje neophodno obaviti o prijedlogu u cjelini. Zatim je prijedlog dao na glasanje.

Od prisutnih 34, za je glasalo 15, protiv 13, uzdržalo se 6 poslanika. Po entitetima, iz Federacije BiH za je glasalo 13, iz RS 2.

Predsjedavajući je konstatirao da prijedlog nije dobio entitetsku većinu, pa je odmah proveo postupak usaglašavanja u Komisiji Kolegija.

Kako u Kolegiju nije bilo saglasnosti, predsjedavajući je proveo drugi krug glasanja po entitetima. Iz Federacije BiH u drugom krugu protiv prijedloga glasalo je 7, a iz Republike Srpske 10.

Zamjenik predsjedavajućeg Šefik Džaferović izrazio je sumnju u entitetsko glasanje i predložio da se glasanje ponovi i izvrši prozivkom.

Sekretar Doma Branka Todorović prozivkom je provela glasanje za Republiku Srpsku, kada je 10 poslanika glasalo protiv prijedloga Vijeća ministara.

Predsjedavajući Doma Martin Raguž konstatirao je da Dom nije usvojio prijedlog Vijeća ministara za imenovanje članova Komisije za koncesije.

Ad – 14: Prijedlog rezolucije o priznavanju statusa i prava nacionalnih manjina državljana bivše SFRJ u Republici Sloveniji (predlagač poslanik Sead Avdić)

Predsjedavajući Doma u kratkim uvodnim napomenama skrenuo je pažnju poslanika na Izvještaj nadležne komisije, koja je podržala Prijedlog rezolucije i usvojila dopunu koja je sadržana u Izvještaju.

Povodom Prijedloga rezolucije nije bilo rasprave.

Dom je, s 23 glasa za, 4 protiv i 5 uzdržanih usvojio Rezoluciju o priznavanju statusa i prava nacionalnih manjina državljana bivše SFRJ u Republici Sloveniji.

Ad – 15: Prijedlog rezolucije o privremenom moratoriju na član 121. Poslovnika Doma (predlagač poslanik Nenad Mišić)

Predsjedavajući Doma u uvodnim napomenama rekao je da nadležna komisija nije podržala Prijedlog rezolucije.

Kako nije bilo rasprave, predsjedavajući je Prijedlog rezolucije dao na glasanje.

Za Prijedlog rezolucije glasalo je 13, protiv 14.

Prema tome, Dom nije usvojio Prijedlog rezolucije o privremenom moratoriju na član 121. Poslovnika Doma.

Ad – 16: Izvještaj Zajedničke komisije o nastojanju za postizanje sporazuma o identičnom tekstu Zakona o važnosti javnih isprava

U okviru ove tačke nije bilo rasprave.

Dom je jednoglasno (prisutno 28 poslanika) usvojio Izvještaj Zajedničke komisije o usaglašavanju identičnog teksta Zakona o važnosti javnih isprava. Predsjedavajući je konstatirao da je ovim konačno usvojen Zakon o važnosti javnih isprava.

Ad – 17: Izvještaj Zajedničke komisije o nastojanju za postizanje sporazuma o identičnom tekstu Zakona o izmjenama i dopunama Zakona o zastavi BiH

Dom je, također bez rasprave, usvojio Izvještaj Zajedničke komisije o usaglašavanju identičnog teksta Zakona o izmjenama i dopunama Zakona o zastavi BiH, čime je i ovaj zakon konačno usvojen u Predstavničkom domu.

Ad – 18: Izvještaj Komisije za ljudska prava, imigraciju, izbjeglice i azil o stanju ljudskih prava u predmetu Tržica Arizona

Ruža Sopta predložila je da se rasprava o ovom izvještaju odgodi za narednu sjednicu s obzirom da je sjednica trajala predugo i da su poslanici jako umorni, a radi se o veoma važnom pitanju gdje su drastično narušena ljudska prava

Zlatko Lagumdžija podržao je prijedlog gospođe Ruže Sopte i rekao da i on ima primjedbu na jedan od sporazuma, da će postaviti pitanja na koja treba dati odgovor, pa on zato predlaže da se sporazum pod tačkom 20.a) odgodi za narednu sjednicu kad bude prisutan neko iz Vijeća ministara da može odgovoriti na pitanja.

Momčilo Novaković saglasio se da se odgodi rasprava o predmetnom izvještaju, ali je zatražio da se ostale tačke završe.

Predsjedavajući je konstatirao da se rasprava o ovoj tački odgađa za narednu sjednicu.

Ad – 19: Imenovanje članova komisija Doma

U okviru ove tačke izvršena su imenovanja kako slijedi:

- **Mubera Ušanović** imenovana je za člana Administrativne komisije, umjesto Šefika Džaferovića, i za člana Komisije za ostvarivanje ravnopravnosti spolova u BiH, umjesto Seade Palavrić.
- **Mara Perkanović** imenovana je za člana Komisije za vanjsku trgovinu i carine, umjesto Momčila Novakovića, i za člana Komisije za ljudska prava, imigraciju, izbjeglice i azil, umjesto Miloša Jovanovića,
- **Ruža Sopta** imenovana je za člana Komisije za finansije i budžet umjesto Filipa Andrića i
- **Vinko Zorić** imenovan je u delegaciju Parlamentarne skupštine BiH u CEI umjesto Filipa Andrića.

Zamijenjeni članovi automatski su razriješeni dužnosti članstva u navedenim tijelima.

Ad – 20: Davanje saglasnosti za ratifikaciju:

- a) Prvog amandmana sporazuma kreditnom sporazumu između Bosne i Hercegovine i Evropske banke za obnovu i razvoj,
- b) Sporazuma između Bosne i Hercegovine i Švajcarske Konfederacije o unapređenju i recipročnoj zaštiti investicija,
- c) Sporazuma o naučno-tehničkoj saradnji između Vijeća ministara Bosne i Hercegovine i Vijeća ministara Srbije i Crne Gore,
- d) Sporazuma između Vijeća ministara Bosne i Hercegovine i Vijeća ministara Srbije i Crne Gore o povratku izbjeglih lica iz Bosne i Hercegovine i Srbije i Crne Gore.

Momčilo Novaković, u kraćoj raspravi, rekao je da se ne slaže da se odloži rasprava o sporazumu pod a) i zatražio da se i o ovom sporazumu Dom izjasni.

Predsjedavajući Martin Raguž rekao je da, po Poslovniku, on mora dati na glasanje prijedlog poslanika Lagumdžije da se o podtački a) odgodi rasprava, pa je pozvao poslanike da glasaju.

Za prijedlog su glasala 22 poslanika, 10 je glasalo protiv, jedan poslanik se uzdržao. Predsjedavajući je konstatirao da je prijedlog Zlatka Lagumdžije usvojen i da se za narednu sjednicu odgađa rasprava o Prvom amandmanu sporazuma kreditnom sporazumu između Bosne i Hercegovine i Evropske banke za obnovu i razvoj.

O ostalim sporazumima nije bilo rasprave.

Na prijedlog predsjedavajućeg Dom se istovremeno izjasnio o sporazumima pod b), c) i d)

Nakon glasanja, predsjedavajući je konstatirao da je Dom jednoglasno dao saglasnost za ratifikaciju sporazuma pod tačkama b), c) i d).

Ovim je, u 22,45 sati, završena 35. sjednica Predstavničkog doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Martin Raguž